

柳

五

集

禮

卷六



自序

朱生五車公知讀書從塾
師受教卷書已能通大義
既長讀經史外語子百家
每不逾覽所於詩嗜甚不

詩騷漢魏六朝李杜初生
名法家沈潜玩味積久
融貫其出之不以詩之心似
免有古人神氣活潑透
于締綯百世竊謂詩士出於

性情遠乎聲者謂之自然
有神動于隨之妙者謂之
至矣矣夫殆未可為險語
語以人而難解為工此古詩
者所取其以自勉格取高調

不晚立不遠、寂在潔以爲古
任走門路之正斟酌古今
揚清濁澤、融變化合爲一格
出於名杜之間、此非敢曰
能之至也、然美乎生志完

悅之明作痛下人凡一切何事
公之接於心家素矣中才
尼窮流離困極乞乞蒼生
間無心自接之願其志素不
少性性之弱境也或為執事
少

昂然壯之語既繁其所以安而志步
取自小而以其寡而能肆力以
大拓之故以濟不滿立性明悟
遂可以聞道而性於詩後之在
焉以至於老且死此亦為如歟哉

曰夢太冲二者以玄晏一序
遂名多古吾子之詩三之無序
乎曰息庵公見余少以稱之曰
方今卷中流中亦未嘗名公曰
矣曰其素曰一唱三歎之者至

於晚後以作爲公俱來及見
多此見之未盡其所以論又如何
也爲公文今年哭淺而害其後
此之子也公所安用序其哉
今年病甚急忽之發以匿中

莊子藁冊繫就約得賦三
首詩一五六百二十七名文四十
二名聖書爲十卷遂自名叔子
後以覽書知朱於詩用力之
多未如此云

崇禎紀元後再甲子仲冬

子初陽浩以泰淺



柳下集卷之一

南陽 洪世泰道長

著

賦

鴈賦

夫何噦噦之鳴鴈秉厥德之可貴表耿介之貞性稟
英粹之正氣節陰陽以動靜順天道而與俱乘春冰
以北遊望流火而南徂翼長風以高厲影浩蕩其所
如旣嘹唳而命侶紛聯翩以成行朝遊乎瀚海夕息
乎江湘歷楚塞之重雲踐吳洲之飛霜樂中澤之洵
訐昧雲羅之潛施惟蹈危而罔戒奄摧翮而見羈幸

不肉於庖俎荷君子之深慈充朝夕之賞玩服馴養
於軒墀歎舊侶之相失憐羈羽之無依承光榮於顧
眄保性命而不違托喬木之清蔭媚華沼之漣漪循
廣除而飲啄跂雲衢而徘徊若乃蓐收戒節西顓肅
殺涼飆夕升白露晨結庭柯撼而始落潭水皎以彌
潔悲霜泣之莎雞感風號之柳蛩於是夜氣澄廓天
宇崢嶸孤月流光星漢縱橫回翔顧影躊躇長鳴揚
雲際之逸響引空外之遐情和朔管之寥亮應隣杵
之斷續聲哀切而淒耳形枯瘁而慘目彼韓娥之善
哭與莊舄之悲吟猶不若乎茲禽諒易感於人心何

昔日之雲翰今直受此羈紲嗟塵區之迫阨渺天路
之遼濶非翬霄之無力有排風之毛質仰鸞凰之高
舉陋雞鶩之與匹縱屈體於泥滓於抗志於霜雪匪
科梁之足戀甘守素以處已方啣感於殊眷故僣勉
而順止苟繕性而委命又奚患乎辱殆愧漸陸之無
儀慕遵渚之自在譬久客之懷歸寧痿者之忘起願
終養乎六翮庶一舉而千里

閔志賦

閔余生之窮阨今伊險艱之備嘗固人不堪其憂今
唯靖處而自將譬折劍之無用今混沙礫而沉藏汨

回盪其銷鑠今餘百鍊之寸剛昔余之不自量今謂
天與之在我不以人而豐嗇今晞舜顏而則可聖賢
之尚可學今矧乎文章之外餘罇心而壹志今考極
乎詩書博綜而微牘今循古而正趨慕狸萃而彫蔚
今庶穠蔭而食諸懿不朽之盛事今亦夫人之鴻圖
蓋無物之不用今寧有美而或遺顧匏繫於偏隅今
樊鴨東而限之騏驥之絕足今奈長縈以維繫驚鳥
之鍛羽今而雞鶩之不及陳良楚產而北學今耀姁
節於中國李札拔跡於菰蒲今論四樂而不忒緬二
子之遺風今增余心之慨惻天路劃其崢嶸今仰浮

雲而太息絀遐武於羊豕兮甘衆人而塞默惟端操
而彌厲兮曾不隕獲而自抑身庠陋而志亢兮乃自
寇之道也不儕俗而介時兮非今世之好也人非之
固可兮奈何天之疾怒旣窮我以坎壈兮又重之以
禍故何遭時之罔極兮哀余爲此孤獨紛百憂之內
蝕兮類中骨以首毒幸縷息之猶保兮顧撫已而非
昨曾少壯之幾何兮老倏焉而云迫非餘景之足翫
兮悼竒志之中落欲守靜而自潔兮恐或委夫溝壑
欲改度而徇物兮耻委骸而容媚夫惟苦心而危行
兮疇證嚮乎此志懷鬱悒而自愍兮指九天余照察

曰人生固有定命今判貴賤與窮達非仇憾之或私
今豈智力之能脫君子之固窮今貴貞執而不化彼
小人之戚戚兮淫與濫以爲過仲尼大聖而離患兮
糧絕陳而弦歌回也樂於陋巷兮操簞瓢之亦多思
不病於蓬蒿兮屈一言於結駟衛武之耄期兮猶陳
戒以疆義潛夫之憤世兮因著論而有章仲卿臥涕
於牛衣兮遭室譴以激昂自古聖喆之皆然兮胡獨
爾之足愾旣尚志而詭時兮宜厥躬之困躓何夸辭
而眩愚兮亦招菑以自累盍反其本兮居正以俟刊
華就實兮惟道是求存心養性兮樂以忘憂斯瘳而

肥今雖約而裕存吾順而沒寧今豈非爾之可慕崇
厚生而賤節今故前志之所郵勉艱貞而自廣今乘
大化以優遊奉皇命而感激今乃詔余以明訓俾弗
陷於罪戾今羌守道而篤信幸垂惠於牖蒙今惕反
顧而深思誓朝聞而夕死今復奚懼而奚疑

次韓昌黎感二鳥賦

并序

余閑居無慘偶取昌黎感二鳥賦讀之喟然而歎曰
退之之才而亦有是乎是時退之年甚少得進士其
拾青紫取卿相以光耀一世卽其所自期者而顧其
身急於飢寒號呼望哺於人至於三上光範書而不

見報狼狽出關促促奔走於道途塵埃之間何其困也嗚呼夫以天下豪傑之士而使之流落不遇至於如此爲其時宰相者烏得以辭其責也然彼憬耽輩皆庸人有目而不知退之則亦何足責哉或譏退之此賦之作蓋自歎其不遇而羨二鳥之光榮不亦鄙陋之甚耶余謂此退之少時事負其雄才無所發施而怫鬱抑塞感激不平有若巨防之蓄水畜之既深浩洶勃怒其勢不得不一決而去之及其有物觸于中奮發爲文詞以寫其無限鬱之氣此蓋出於文人之習氣而誠有愧于知道者之言也然原其所爲

出於一時邂逅之感而未必其心誠有所歆羨而然也蓋其意若曰彼無知無用之物而徒以羽毛之異見知而貴寵之如此獨於天下之賢才不知愛焉是知人之不如知物愛人之不如愛物此其所以爲憾者歟竊嘗論之退之雖有文學而不及孔門之四科觀其應舉求仕汲汲希用於世此固非爲己之學而游夏之所不爲者若使退之早得聞道從事於博文約禮則其必能以義日處而不爲外物所動者矣是故君子之道貴乎安身立命余貧賤阨窮比退之又百千焉常懼其窮濫未免爲小人之歸於是有感于

中者遂次而和之以廣其意云

芒芒玄化俯察仰思彼貴賤榮辱之不齊將誰從而
詰之覽白日之無偏均下燭以光景慨天道之猶憾
何冬促而夏永紛草木之榮落關一氣之仁猛惟萬
物之爲命蓋亦有其蓄幸繫學道而求志韜厥躬而
內耿何罔生之無厭唯貪儂焉是逞余不忍爲此態
顧吾駕之焉如胥天下之主廣宜審擇乎爾居嗟聖
祖而道伏味糟魄公殘書苟不可則從好斯先詰之
警愚卓流俗而孤立寧或提於衆寐乃不磷而不緇
援金石以與比旣天德之信修伊人爵之可致不自

靖而外圖是求榮而反累孰有動而違天孰有行而
廢地吾將順乎自然庶不疚於素位悟韓子之感鳥
故文肆以爲戲知吾人之攸貴寔有靈於萬類

詩

送李子春之嶺北

去歲伏波幕今年出塞游壯心歸白髮邊色上烏裘
驅馬關山道磨刀隴水流誰知萬里客初亦志封侯

寒食

野水明春日山村隱杏花東風寒食節古墓有鳴鴉

題李文蘭詩後

文蘭江州秀才虞尚卿妻也年二十一

被虜清兵爲藩陽王軍

京所買路經榛子店題詩壁上日惟髻空憐昔
日粧征裙換盡越羅裳爺孃生死知何處痛殺
春風上潘陽客自燕中得此詩
來示余余見而悲之遂題之

江南江北鷓鴣啼風雨驚飛失舊樓一落天涯歸不
得潘陽城外草萋萋

滿月臺

故國青山在荒臺落日斜當時一統地殘郭幾人家
玉樹翻樵唱銅駝隱野花千年有衰柳夜夜怨啼鴉
逸吏述夫赴燕

平生無地試奇才此去遊燕亦壯哉馬上聽歌臨易
水草間揮涕弔金臺誰知左海胡塵入獨看中原漢

月迴莫把興亡論往事江南詞賦不勝哀

偶述

雪堂餘派接江西東土千年七聖迷不上崑崙最高
頂安知天下萬山低

出塞曲

陰山北去但黃雲羌笛琵琶不忍聞當日和我爲上
策漢家那惜一昭君

西宮怨

金井梧桐白露團玉階羅襪夜深寒可憐一片西宮
月不似昭陽殿裏看

青樓曲

胡姬春酒柳花飛一曲嬌歌金縷衣樓下少年來繫
馬灞陵原上獵初歸

讀屈原傳

楚客懷沙去不還江南秋色滿湘山至今有恨藏魚
腹萬里君王入武關

金山

壬戌

長安回首北辰懸地盡南垠更渺然大壑魚龍看在
下孤城風雨坐無邊山川滿目非吾土歌舞留人是
別筵愁殺明朝催解纜永嘉臺外水浮天

永嘉臺

權公盼爲萊伯時等此臺權出永嘉故名之云

捍海堤成納萬艘永嘉功力此臺高濶吞廣利神墟
盡橫壓支祁鐵鎖牢我欲孤槎直貫斗誰將大釣一
蓮鰲因風寄與羣仙語度索山頭醉碧桃

釜山歌

釜山城頭雲不開釜山城外浪崔嵬層陰釀作魚龍
雨多自東南海上來

其二

燕市綾羅萬橐駝草梁朝日錦帆多舟中每見蠻兒
舞岸上稀聞北客歌

沙工浦舟上

浦和馬島
西偏也

客臥海天濶孤舟星月多
釜山朝在眼今夜忽蠻歌

對馬島

天外人烟落島中
斷開岑嶸結爲宮
城根半挿鼉鼉窟
市陌交穿橘柚叢
頗恠山川移粵色
尚看民俗帶秦風
客心懸彼孤帆影
更與溟流日夜東

早發對馬島

曉色星沉海鳴榔
浦靄間港平吞巨浪
帆轉出前山赤日浮
三島青天繞百蠻
飛船捷於鳥突去杳
難攀一歧放舟

橫海孤槎路不迷長風吹我入無倪相隨獨有青天
色却視扶桑在水西

其二

康回怒觸不周山地軸東傾滄海間徐市當年亦豪
傑不臣秦帝王諸蠻

赤間關

孤島根危地接虛積流南浸祝融墟路通河漢乘槎
上人有蓬萊採藥餘海戍幡旗連瘴氣水祠圖畫雜
變書恠來數日風濤壯莫是天池變巨魚

安德天皇神廟

廟在赤間關彌陀寺中古有安
德天皇與源賴朝鮮敗溺水死

國人哀之爲立祠塑像歲祀之壁
上畫當時戰作之狀宛然在目

古廟乘舟入門前滄海深戰爭餘畫壁香火寄祇林
翠栢千年老浮雲每日陰遺魂水底在應得化冤禽

次成伯圭韻

嚴程不憚涉危艱一葦行穿上下關脚踏鄒生談外
地眼看秦帝夢中山漫空海色環孤島近浦人烟帶
百蠻此去應須三萬里仙槎直拂斗牛還

發赤間關

積水無終極東行日杳然三山何處是萬里一帆前
鯨戲爭吹浪鵬飛直負天暮投龍戶宿孤島有人烟

上關

片帆東去浩無依
雲海冥茫接四圍
日月每看從底出
鵬鵬不礙上天飛
張騫使節何超忽
徐市樓船有是非
却恐舟中皆羽化
一時相與御風歸

室津

朝發牛牕纜揚舲
向室津島中遙辨樹波際忽逢人
玉節披炎瘴金函走海神
東瞻使星轉夜照十洲濱

舟中示安伯倫

我欲登銀漢君須詠遠遊
死生無異慮風浪有同舟
笑語通鯨室帆檣觸蜃樓
子長誇壯觀曾亦到瀛洲

次李耳老韻

繫纜楓林杪寒蓬浦嶼隈燈前他國語天外故人杯
龍臥雲初定鼉鳴雨復來舟行且莫住明日到蓬萊
少憇路傍松樹下望海

長松落落海茫茫倚馬松陰一望洋誰斷金鰲立四
極坐看紅日出扶桑蓬萊有藥無人到秦漢求仙不
自量我欲乘槎從此去直窮天水盡何方

自汶浦乘船夜行曉泊大坂浦

長河水路接倭京夜發扁舟曳纜行過盡重灘初泊
岸潮平月落見孤城

出河口入海

泛海還茲役歸舟喜向西身輕豈自有意定不曾迷
地盡餘天大波長去日低三山忽已轉一點隱乾倪

廣陵道中

甲子

去家十里地便作千里思千里自茲始征馬亦不遲
終南昨在眼今已不見之連山際平野鬱鬱何累累
首春雪未盡雲物藹有姿原蕪青欲芽野馬團相吹
大江橫我前日融流斷斯關關雙睢鳩容裔在河湄
我行方未已忽忽中自悲

隅川

客愁不可道客遊何太苦笑我胡爲乎非工亦非賈
逃矣山海鄉風聞有樂土歎彼碩鼠詩感慨寧獨古
英雄時不遇亦或甘草莽身若孤蓬征飄飄靡定所
暮投水坪村茅茨兩三戶晨星出照人行旅起相語
早行慎前路山深多豺虎

羈旅行

草木不離本客土根株危男兒不離鄉憔悴被人欺
在家思遠遊遠遊復思歸關山高際天艱哉多險巇
懷役不遑息人馬亦已疲解鞍窮林底徒侶共威遲
俯聆哀壑湍仰攀松栢枝松栢何鬱鬱水流無已時

客心一如此歎息誰復知

橫城道中

正月欲闌春水生峽中山水澹孤清危巔雪在燒畬處幽谷禽和伐木聲落日瞻雲思白岳東風立馬問橫城黃坪此去經榆峴嶺路崎嶇不可行

峽中

不踏峽中地誰知行路難陰崖三尺雪虎跡大如盤
其二

山谷不見底側崖多老木無人來剪伐野火入空腹
指爪庵

絕頂僧猶在深山花自開無人識幽逕暗入翠微來
指爪庵贈智閑釋

高僧不出山身與山木老客來無一言滿地生春草

黃坪

峽路泥深沒馬蹄雪消春水漲東西野田宿麥青青
細白日山雞上樹啼

大關嶺

白頭山自北極來千里南奔結五臺五臺邈迤東際
海大嶺崛起何崔嵬天作重關限東西行人到此愁
攀躋連峰直上烏道懸我馬忽在雲中嘶是時春寒

大雪後雪没人膝數尺厚猛風刮地聲吼怒觸碎山
石石亂走松濤澗水振巖壑勢挾雷霆噴薄傍人
向我指空青云此是東溟俯視不可辨雲海浩冥冥
蔚陵之島在海中天晴或覩多晦濛願呼羲和日馭
出大明照臨天下同關山一何險遠遊良亦苦吾將
詔夸娥剗却爲平土然後不令行旅更登山坦步日
夜相往還

珍富村

峽內居民少柴門恒不關春耕分一壤野燒上他山
雉雒平蕪暖牛眠獨樹閑謂渠仙亦可生老白雲間

清明

寥落他鄉獨聽鶯
竹西樓上過清明
坐來江色忽無際
愁處花枝開自橫
客舍共誰浮白飲
故園思汝踏青行
連山不得遮歸夢
每逐東風入漢京

橫城道中

漢陽梨花春欲暮
行人尚在橫城路
孤村曉鶯三兩聲
驅馬悠悠映林去

水村秋興

寒郊莽蒼日徘徊
九月西風吹水來
客裏偏驚授衣節
愁時獨立望鄉臺
江天鴻鴈不知數
野迳菊花空

自開三角登高十年事白雲峰色滿深杯

送範弟西行

汝去投何處孤行多所憂青山向西望落日滿坡州

水村感興

山家人起早衆雞號天曙客子悲葛屨歲晏踐霜露
中野虛無人明星照我去溪回山且險水深不可渡
東方何其遲南北有歧路

其二

朝日何杲杲照此野田中田中何所有葵藿與蒿蓬
葵傾向太陽蓬飛逐長風清霜霑野草零落與之同

君子抱貞操誰能亮我衷

其三

我行墟里間蔓草何離離
借問誰家墳相對正累累
樵牧登其上狐狸夜鳴悲
人生有如此富貴能幾時
齷齪百年內嗟爾欲何爲

其四

山田刈黃梁水田刈晚稻
今年稍有收霜降幸不早
田家休歲功放牛野中草
閑時上東臯顧瞻望官道
落日映山澤雲水白浩浩
夜歸茆堂臥濁醪聚隣老
農談非妙理亦足開懷抱

其五

塗塗管中露肅肅瓠上霜涼風日夕起遊子戀故鄉
明月出東山忽已照我裳星漢高且亮原野一蒼蒼
哀鴻號枉渚烏鵲翻南翔川塗渺遠懷徙倚以彷徨
所思不可見喟然獨悲傷

其六

感沸野中泉湛湛清且冽晨起挹素源漱齒取斯潔
清心去塵垢爽朗氣朝徹烟霜淨天宇稍見山外日
萬象俱境空高興杳蕭瑟兀然坐中田孤鴻映天沒
喜韓子來訪

君從東陌來何以度深雪手弄沽酒錢夜半扣我室
知子洛陽豪急難誠所切攬裾坐中堂感歎叙契濶
往念固多憾卽事聊可悅華虫燒熾爐美醴甜勝蜜
舉杯延素景燭燭當窻月人生有離合明月有圓缺
長夜可以敖願子無遽發

至月初十夜同妙軒會洛誦宅酒後賦詩

去時登樓孟秋月今日登樓三尺雪往來人事倏迴
換誰謂一城千里別我如尺蠖蟠在地百憂深室臥
不出朝來雙鯉傳消息忽復相逢北山色高樓虛閤
山月寒星漢縱橫氣微白且將樽酒慰茲夕展詩清

歌宛如昨盧卿自赴魏齊阨阮籍謾作窮途哭嗟我
平生得有我二公老死溝洫吾亦足

初度日亨甫持酒相勸

我之生日月初弦寒氷積雪俱淒然此時何以慰我
懷多君不惜沽酒錢小婢持酒瀉玉缸燈明酒溫夜
何長相與談笑樂未央醉來却憶童稚時與子同騎
竹馬馳可憐意氣凌四方男兒富貴心所期三十忽
過壯志闌昔何慷慨今摧殘我髮已欲成素絲君顏
安能如渥丹人生百年東逝波有酒不樂奈老何

贈亨甫別

惻惻復惻惻此意難具陳千里在今夕別我平生親
非無樽中酒可以展慇懃投袂眷西顧川路浩無津
游子悲故鄉馬鳴思其羣去矣何所言悠哉遠征人

其二

自我失其所惟子得相依惘然急難意生死兩無違
前期指百年中道聚散之慘袂且須臾蹊蹠臨路垂
回風飄廣陌白日黯已微征車自茲遠臺臺恒渴飢

其三

芄芃草中狐踴踴何所求嗟哉流離子出門懷故丘
惘然去親友薄言適海陬玄冬冰雪盛弊我征衣裘

他鄉難久淹就食非遠謀開春反桑梓與子以遨遊

從軍行

乙丑

驄馬金鐙鐵鍛鞍爲君西去斬樓蘭平生誓勒燕然石今日方知隴水寒

采蓮曲

歡乘白鵝舫招我由若耶波間種蓮子已作並蒂花

丹井

蒼巖瀉丹溜下有雙古井山人不來飲山月夜流影客自燕中來以山海關詩示余和之

長城萬古一雄關鐵壁崢嶸鬼莫攀赤日倒看生渤海

海黑雲平撫蓋遼山防胡自失秦宮內猶夏難禁漢
代間獨倚高樓空悵望暮天無際鳥飛還

北山歌贈衆妙軒主人

北山嵯峨龍虎雄歎雲吸露與天通雨對木覓西弼
雲百靈彷彿朝烟空北斗七星上森列夜夜神光照
城闕層城宮闕五雲間萬戶千門盡向山山上青松
道傍草車馬憧憧徃復還徃復還南陌頭君獨結廬
山之幽朝看暮看心莫厭更爲青山起小樓昨夜雷
雨殷東峰蒼崖瀑布垂白虹我來高枕不知暑借君
萬壑長松風乃知城市有大隱何必淮南桂樹叢

過妙軒

坐我茅齋上披君水墨圖
雨來諸洞黑雲去兩峰孤
澗曲風湍合柴門草樹紆
西林隱餘景山鳥暮相呼
晚晴

北山雲霧未全開昨夜山風挾雨來
小院新涼生几席層城霽色動樓臺
烏鴉閃日爭高樹蟬螀橫天曳斷雷
西閣故人遙憶汝異時河朔圖含杯

玄庵對雨

天際浮雲夕未還散爲飛雨滿柴關
西風叢菊寒垂地九月狂雷殷在山
燈火欲親妨白髮酒杯相勸發

朱顏明朝却恐秋歸盡蕭瑟霜楓不可攀

遣興

天地何其大我生何其眇方寸周萬物稱心良獨少
乃甘守雌伏稍已去膠擾冲襟抱虛白眇默契衆妙
古今莽浩蕩醉夢俱未曉浮雲向南飛狴彼雲中鳥
願以千里心寄之寥天表

其二

瓠生野田中瓠葉何離離黃鵠厲羽翼千里一高飛
丈夫有遠志小儒安可爲高步出閭闔駕我四牡馳
蘭皋騁脩軫天路遠如期舉足蹈瑤光左攀弱木枝

羲和勿遽迫照我芙蓉衣

懷禮卿

明明雲間月可望不可掇與子共城中劇於三歲別
良爲憂痗故得與親愛濶有滄興北岳苦雨遂連日
阡陌曖在眼塗潦沒我轍褰帷眄中園有瓜復有葛
瓜蔓子離離葛葉相糾結感物抽所思何以慰忡悒

江曉

雞鳴水村曉月落海門空漁子已搖艇棹歌烟霧中

好雨

平寅

好雨潤萬物濛濛連日陰暄禽各春語老樹亦花心

隱几成孤睡開樽引細斟韶華漸爛熳幽興坐難禁
過問禮卿病居

桃花欲吐柳含烟黃鳥雙飛鳴可憐今日風光正如
此請君徐起視春天

過妙軒

蕭條讀書室閉戶闔無人澗草入幽逕庭花飛暮春
永嗟天下士難作地中身依舊西山色蒼然滿四隣

大江

大江涵萬象天水混空清岸斷峰相對舟行樹欲迎
浮雲雨外黑落照浦西明白鳥何孤潔雙飛羽翮輕

石門

石門巖壑陰且森沿溪步到青松林流水泠泠學人
語白雲悠悠同我心采藥誰能入深洞浣紗或見依
清潯西峰日隱雨欲至忽有天風吹滿襟

晚霽

長天澹夕霽獨立倚柴門去鳥無留意孤霞有斷痕
山應迎岸幘月已到開尊不見同心子幽懷誰與論
自燕尾乘舟上京舟中漫賦

解纜朝辭燕尾亭風帆遙指幸州城秋江水漲舟如
馬兩岸青山逆送行

其二

舟人苦說祖江險江海相衝生怒波進棹則難回棹
易好風常少惡風多

其三

祖江金浦一帆還晚泊孤村洲渚間多少漁家共烟
火半臨江水半依山

其四

海門月落水生烟舟子相催發曉船此去秦京五十
里早潮須趁上陽川

其五

大江之流源五臺波濤萬里吼奔雷水邊樓閣參差
見天際帆檣次第來

渡陽川

秋風蕭瑟動江關此去吾當幾日還瞥眼舟過孔巖
渡回頭雲隔弼峰山浮生有累形骸內壯志無成道
路間辛苦不辭躬負米且將甘旨慰慈顏

其二

捨舟騎馬歷長洲轉出楓林絕岸頭獨鳥背人方北
去長江引我故西流蒼茫落日低金浦縹緲遙山擁
沁州此路往來今已熟異鄉羈旅只生愁

天登橋

馬上欲誰語垂鞭行且謠高秋富平野落日天登橋
近者釣船少孤村樵逕遙西風莫吹鬢客意正蕭條

積石寺

巖巖積石寺岌業倚天壁崇深山海勢縹緲龍象宅
高窗瞰遠濤浩淼萬里白山寒多霜露楓葉爛已赤
冥搜選佳境曠懷超宏域三淵讀書處登眺想所歷
老僧厖盾皓自言名天策曾從玄度游竊比道林釋
揆予則同調遇爾猶舊覲禪房晃佛燈清磬響山夕
語闌月東出萬籟俱境寂

詠懷古跡

檀君遺跡杳雲霄
摩岳城壇歲月遙
史閣有神留秘藏
麗陵無樹記前朝
亂餘民物多凋弊
霜後山河更寂寥
千古英雄不盡恨
甲津風雨夜鳴潮

其二

行朝無復舊樓臺
兵火傷心百戰來
空苑入春鳴野雉
廢池經雨出殘灰
營開鎮撫關防壯
事去昇平父老哀
獨有遺祠忠烈在
每年霜露薦香迴

其三

望洋浦口海漫空
萬里登萊一水通
故國寒蕪看落

日扁舟白首臥西風乘槎漢使浮雲外飲馬胡兒絕
島中恨殺當時林慶業獨無天意與成功

其四

沁口山川似石頭登臨一望使人愁風烟夕暗昇天
堡鼓角秋悲鎮海樓自有雄都稱四塞誰將往事問
東流迺來水路波濤穩多少西南賈客舟

其五

海上秋陰黯里間至今猶憶亂離初忠臣不必公卿
出烈女皆堪太史書社廟歲深多拱木陂池水濁少
嘉魚 聖朝終始安危地保障唯須尹鐸居

祖江舟上

巨觚安如屋中流坐渺然心知祖江路背指幸州天
落日山橫處孤雲鳥沒邊晚潮須借力今夜宿陽川
其二

風色東南轉船旗西北吹白波揚更入青嶂坐俱馳
樹出知漁舍鴉鳴見水祠相逢下江客駐楫問京師
宿三淵宅洪姜二子亦至掇菊汎酒醉後賦詩
萬古一知己夫子乃許我猶言策蹇劣未遣恤埵圯
徘徊北林側復此清夜坐風雨暖山陂草閣明燈火
良友亦云借握手酒樽左英英霜中菊歲晏餘數朶

幽芳挹已盈細酌醺亦可人生樂今夕離合則無那
迢遙楮島閣浩蕩西海舸

叙別

人生於世間離別固有之萬事苦繚繞微纒方見持
妻孥交謫我家室不遑宜中堂是明燭骨肉團在茲
肴膳縱橫陳勸之以深卮酣暢庶輕別愴悰終寡怡
雞鳴夜如何起視天星移煌煌東方曙我車已載脂
嚴霜降百草曠野鳴淒颼居人恍若亡行者那不悲
西路浩其永綿綿我之思

奉送申評事赴北幕

學士金門貴胡爲出北方將軍開幕府書記佇才良
秘略包黃石邁文邁孔璋清官名甚盛利器用彌彰
逖彼要荒域當時韎韐鄉地形連朔漠民物雜戎羌
列堡白山下開營青海傍六城吹角應千騎挽弧強
俗惡常雕悍時危易陸梁卽今多虜釁何以靖邊疆
礪操堅如鐵宣威肅似霜要令服王化益見重關防
晉獵宜還獸吳爭絕採桑戍樓閑劍戟空磧散牛羊
江注鯨波黑雲和畜氣黃山川應變色日月却回光
草檄終何用投壺也未妨平生有壯志此別莫徒傷
四牡征夫急東風嶺路長加餐慎行役雨雪尚其雱

讀諸葛武侯傳

樂道初同莘野翁托孤還復似周公蕭條天下三分
地辛苦祁山六出功不許中原歸定筭空教北斗照
危衷傷心錦水留祠廟古栢千秋有烈風

送李汝長之嶺北

驅馬越大河北走關山道男兒有壯心多向客中老

憶阿鳳

愛子父母情不必論男女昨見家中書道汝已能語
喜逢劉德而登息波樓對酒作

故人顏貌忽依然來自雲山若箇邊却坐高樓如夢

裏更將華髮向樽前北城盡角千家夕西海離心萬
里天京口梅花留後約直愁歸去入新年

時德而將
往海西

寄題閔氏亭

在摩尼山下義
皇村臨海上

摩尼山壓巨乘墟海色樓臺動碧虛吐蔓林移西域
菓養兒池放北溟魚素封好時田園是高臥羲皇日
月餘鮫室夜珠光不定爲君來燭案頭書

山夜吟

山夜湛昭廓星月皎光彩空象垂北辰積陰歸西海
踏雪每孤往攀梅欲誰待美人不在茲宿昔朱顏改

渡江

三冬滯江海歲盡乃言歸雪裏呼舟急雲端問店卻
有家還是客生世孰非機俯仰乾坤濶飄飄黃鵠飛
野場

晚日原頭開小場野烟山雪共蒼蒼江村臘月得魚
少時有獵人來賣獐

所江

丁卯

控扼西南盡防營閩亦分地形全抱海天氣每垂雲
畫閣搖晴浪春旗映夕曛聖朝邊警息虛老伏波
軍

其二

浦濶山中斷城危地一偏高低盡漁屋朝夕只塩烟
日脚垂孤島潮頭蹴遠天征帆杳如鳥此去落何邊
其三

偶出平沙外閑行積水濱烟波殊未極鷗鳥自相親
白日孤舟夢青天萬象春眼中饒物色終是異鄉人
其四

乞得將軍雙玉瓶春風獨上海松亭城隍蘄絕憑天
勢海島縈紆裂地形積水吞來諸浦白浮雲斷處數
峰青夜深月朗琵琶語波底魚龍亦出聽
其五

南山之外是天池壁立千尋倒影垂珠浦水腥龍臥
處鐵崖霜老鷗巢枝蒼茫別島彈丸出咫尺行舟隔
月期射利死生輕一擲世間唯有弄潮兒

其六

城上崔嵬百尺樓仲春風日凜如秋勢臨絕壁雲厓
峻根插重溟水府幽沙際烟生煮鹽戶浪中人語捕
魚舟海天鳥盡斜陽外盡角橫吹萬里愁

其七

春半關河客意催白頭愁絕望鄉臺故園寒食花應
發窮海東風燕不來幕府虛隨嚴武客山川真愧子

長才生憎最是薜蘿草只管留人未放迴

雜興

所江城外大江橫連日春陰春水生漁子相呼刺艇
去青魚欲上白鷗鳴

土人云鷗鳴則青魚至

春江

春江渺無際極目盡烟波故國不可見青山空復多
歸心結楊柳旅食傍黿鼉已覺舟行久吾今慣棹歌

對雨

荷葉田田荇葉齊水軒寥落雨淒淒臥看雲作魚鱗
起出自東峰盡向西

渡江

積雨長江江水平
扁舟曉發趁新晴
中流日出魚龍動
兩岸人喧牛馬行
霧樹參差無定色
風帆超忽不論程
從茲便欲浮于海
萬里滄波一濯纓

巴江渡口值雨

巴陵渡口水如雷
雨急青楓樹半摧
西望海門千萬里
一帆橫截大江來

叙別

小筵壺酒慰離傷
燈燭輝輝夜未央
客子將行出門去
語星河欲落滿天霜
秋風不貸征衣薄
江水爭如別

意長萍梗此身無定日沁州雖好亦他鄉

橫陵洞口東望海山是自然島

平坡倚馬夕陽天獨鳥東南望渺然海島千重橫不
斷白波多處是仁川

江村卽事

戊辰

春動江湖新浪生舟人鼓楫唱歌聲自言販穀扶安
去三月花開可上京

汾上遇寒食

去年寒食海西頭寒食今年此地留歲月回環何太
促人生行役不曾休東風野店無烟火曉雨桑林有

鵲鳩觸目韶華非故國可憐誰與作春遊

渡三鑿川到村家作

急峽長川束一門沿流此去便窮源危峰劍插浮雲
色細路蛇盤老樹根轉入山來凡幾曲忽看烟處是
孤村峒氓虎豹居相雜終古穹林日月昏

踰長仙嶺

午下長仙嶺崎嶇地少平山田還有主野水本無名
馬上逢花折溪中踏石行尋真由此路冒險也身輕
奉呈清風金使君

清風太守郡中閒留客高樓坐不還兩峽東來千里

水四州分得幾重山
治民只在琴書內
問俗時於鳥獸間
今日看君真吏隱
邑人相見不知顏

和使君觀漁

何處觀魚魚可求
鶴棲巖下衆魚遊
曾來苦被漁梁
隘釣出疑侵水府幽
太守每教疎結網
長年莫詫善操舟
龜潭上接龍門路
日暮雲雷迥自愁

風穴

蒼厓萬古穴
窅篠而崆峒
其中廓無有
歛吸生長風
巽德之所鍾
大塊氣相通
冬月閉栗烈
春陽扇冲融
玄機存弛張
異哉造化功
屏山枕長湖
空翠盪玲瓏

飄蕭青蘋末
憂瑟松栢叢
調調若相應
瀏瀏殊未終
幽人臥聽之
月照寒樓中
灘響和靜夜
天籟流遠空
心境悄以寂
冥意不可窮

島潭

野艇小於鷗
出沒繞孤嶼
寧爲逆灘行
莫作下灘去
其二

轉入水窮處
維舟三島間
來時不辨路
更欲出何山
自島潭歸到碧樓憶三淵

孤舟穿出島潭雲
寒碧樓中不見君
客意春光俱爛熳
梨花如雪落紛紛

義林池

在堤川

百頃圓池積水盈千章喬木接雲平蛟龍抱子深中
臥菱芡連根淺處生採藥初從台洞入乘舟却似漢
陂行欲知灌溉功無限看取郊原萬耦耕

池上同使君待三淵不至值雨晚歸

碧樓前日結幽期何事東遊出峽遲夜月聞鶻魯陵
墓春風繫馬義林池花深皂蓋行相引雨急蘭舟坐
更移卽事未成臨汎興烟波回首已堪疑

凝清閣賦得壺字

樓上花枝近玉壺樓前春水浴雙鳧雲深峽氣交晴

雨日隱洲光半有無賓主不慙滕閣會山川真作會
稽圖扁舟夜下長灘去江月橫空鐵笛孤

陪使君遊霧巖寺

春山何窈窕一路入花林不辨千峰色唯聞孤磬音
香雲扶塔湧老栢坐僧深願借慈航力知君濟物心
鳳棲庵

僧與浮雲出山頭只小庵青苔入香積白日閉花龕
佛有諸神護經餘亂石參遐心寄寥廓一嘯倚風栢
月灘

舟下忠州峽漸喜惡灘少瀧瀨歷幾轉氣色殊昏曉

軒后果神智利涉功未了幽討決奇詭曠懷延浩渺
平湖勢稍殺衆岳氣爭矯輕撓信風力榜歌何窈窕
儻回近渚曲出沒遠村小俯窺波底魚臥聽蘋中鳥
應接紛萬端我心寂無擾蕭然蓬屋內超忽太虛表

彈琴臺

上峽風波舟苦遲棹歌聲到澹川悲空傳于勒彈琴
地可惜巡邊背水師白日沙虫吹朽骨青楓烟雨濕
靈旗行人莫近臺前宿兩岸春山有子規

過荷潭

帆風迅於馬上下猶遞傳舟楫豈不勞高興每無倦

蓬屋容兩人酒壘兼詩卷棹穿赤日去身與青山轉
荷潭淥淵淪竹原鬱葱蒨深柳翳遙村雜花明近甸
時物各生態妙在唯我選風濤晚潮浮天色屢已變
飽經險途涉寧怖急浪濺漆巖可夕纜蒼茫霧中見

蟾巖

西舸正東風竟日猶放溜茅灘噴竹箭舟急山却走
湍嶮互齊汨岑巒故遷就蟾巖忽入眼清淑氣不瘦
原田藹柔綠石厓鬱森秀漁樵各占隈數屋憑雲構
翳然桑柘陰夕暉映半岫茲焉信樂土匪直山水園
何當着吾居滅跡混鳥獸聊用慰遲暮永言願性壽

素心良有然佳處意恒逗

室人勸酒謂月落無燭何余指天河曰以此照
之仍成一絕

對酒何須燭天河照我盃酣歌向寥廓倘取酒星來
觀梅娘黃昌舞歌

黃昌郎真花郎爲君報仇劍如霜短衣行乞百濟市
白日濺血驚君王此事雞林已千古尚有梅娘擅其
舞高堂擊鼓張錦筵試舞一曲當樽前花袍玉帶束
纖腰袖裏雙虹光照蓮掄長袂振輕珮蹈急節應鳴
絃遊龍矯兮驚鴻舉直之無前橫無禦梨花雪色遍

一身驟雨飄風無定所左右觀者皆竦神廣庭寂若
虛無人劃然斫地拗餘怒但見羅襪生微塵吁嗟梅
娘爾絕竒若與黃昌並舞誰雄雌長安少年不敢近
五陵公子相追隨君不見西門秦女休世間無限孱
男兒

昭陽亭

昭陽亭下大江橫木落天高洲渚清萬古山川空
國三秋雲日莽牛坪沙寒水鳥飛難定峽險風濤氣
不平勝地莫嫌淹一月新詩多自客中生

清平寺

清平古寺鎮山門真樂公亡佛法存峰盡忽然開覺
路水窮方得到真源殘碑半蝕莓苔字老檜全摧霹
靂根夜久禪窓留客坐一燈明滅照無言

其二

野鶴孤雲西復東浮遊物外與誰同塵心一濯清泠
後道念偏生寂寞中木落衆峰寒更出月來千界夜
還空淵明每入廬山去不獨當時爲遠公

清平山懷清寒子

悅卿天下士當日伯夷心世路逃蹤遠空門托意深
白雲餘舊色叢桂滿秋陰不識曾樓隱千峰何處尋

石塔

巖頭數層塔僧道自前朝白日照孤影諸天恒寂寥
石壇

希夷誦經處寂寞千峰裏古壇人不行天風落松子

貊國古墟

野池鳬鴨啄枯苴霸氣全消貊國墟此日牛頭餘佛
寺當時蝸角亦王居遺風朴陋氓難化古蹟鴻荒史
失書笑爾羣兒爭割據閱來天地一蘧廬

西歸

西歸明日入鄉關不似蘇秦歷聘還腰下雖無六國

印卷中猶得一江山

楊山歌 已巳

楊州城外暮山橫
春草連天送客行
此地古來多怨別
柳條何事折還生

沙洞草舍寄宿感懷

去就俱無地
人生本自浮
每思還故土
歸後更多愁

過景福宮有感

聖祖曾開萬世基
法宮今日異當時
樓臺地古苔生礎
鳬鴈聲殘草滿池
雲繞夾城猶瑞氣
花開廢苑豈繁枝
昇平一失終難得
人事蕭條父老悲

麝香

山中百草食爲糧縱死猶存一寸香
至寶在身宜自重白雲深處是仙鄉

聞歌

少年豪氣遠遊多憶向江南醉綺羅
今日白頭寥落甚臥聞隣女采桑歌

讀宋史

金匱書徒秘唐虞事莫論還看燭影下
不待老臣言其二

曲學方行世羣賢漸去朝誰知引章呂
有罪甚青苗

其三

舊物終難棄君王不肯還過河呼自苦南去有崖山

其四

滅虜功垂集金牌却復來獄中猶故土終不北轅迴

其五

百戰舟中講崖山日欲沉亦知亡早暮聊盡死前心

醉示德者

風雨孤燈夜似秋故人留我醉西樓高歌斗酒還依舊只是相看各白頭

登尹氏亭

飛閣岩嶢絕岸危八窗無闕受風吹樹間駐馬蟬鳴
處樓上看山雨到時獨鳥東歸平楚遠片帆西下大
江遲傍人不用來相問只爲登臨有好詩

秋思

碧梧迎風初落孤蟬飲露彌清可憐鏡中白髮更着
窗外秋聲

送李秀才歸驪江

送君驪江去立馬雨中語清心樓下柳昔我維舟處
園夕述懷

暝色來何處關門秋樹前園林三逕僻風雨一燈懸

托足曾無地，知心獨有天。紛紛憂樂事，倏已到中年。

重陽

酒與秋山綠，人同霜菊寒。東籬歲暮意，獨坐雨中看。
月下賞菊

寒花同月色，滿地白參差。寂寞空林下，幽芳君不知。
送高仲久赴燕

雨雪紛紛古北平，想君驅馬此中行。臺荒不識懸金處，石裂猶傳射虎名。片月臨關還漢色，哀笳出塞盡胡聲。相逢爲問悲歌士，誰復荆卿易水情。
識一作辨

過宿西翁宅席上用澤堂韻

頻年征役走西關底事風塵不暫閑秋色可憐餘數
日故人相見各衰顏壺觴夜就經霜菊星斗寒垂欲
曙山悵望臨邛倦遊客當時猶在酒壚間

松都行

麗祖提劍芟羣雄三韓統合垂鴻功子孫相承五百
年松都王氣浮神嵩宮闕連雲繚山郭八部絃管恣
行樂玉輦春遊萬騎來彩毬曉擲千花落一朝人事
有翻覆雄豪霸業歸冥漠社稷爲墟稊田荒池臺無
主龍井涸落日蕭條古城下北風枯桑卷中野我向
遺民問興廢橐駝橋邊暫駐馬山河寂寞市朝變故

國繁華君不見康忠舊居雲已去圃老精忠石不轉
嗚呼異代不相期古蹟但使今人悲逝水日夜東流
去豈憶前朝歌舞時

投林子昭村庄

思君聊命駕千里一相過輟棹寒潮落敲門夜雪多
燈前初似夢醉後却成歌明日江西寺登臨更若何

歲暮

歲暮西征客未還白頭愁絕臥江關風威勁拔城根
樹雪意平沉海上山浪跡無端隨木偶歸心不斷掛
刀環可憐李子魯何事辛苦遊談六國間

白川旅舍見劉生夜訪

江城夜雪落紛紛客舍張燈喜見君
却憶當時沽酒處白門楊柳綠如雲

夜雪

遠客無眠燈火遲暗聞樹杪鳴寒颼
平明老翁出門語夜雪壓屋人不知

金浦旅懷

旅泊仍高枕江湖一渺然雲昏缺月夜
雪急仲冬天書劍寧知老英雄不受憐
客遊今亦倦歌動式微篇

其二

燈火寒逾翳星河曉漸微愁多如有病夢遠可能歸
暗犬向誰吠驚鳥時自飛本來行橐冷何用賦無衣

留別洪士謙

別意徘徊滿北林小樓樽酒勸頻斟烏鴉已定寒山
黑松檜齊垂夜雪深聚散不期翻似夢去留爲客共
傷心醉來欲把詩相贈却恠詩成帶楚音

還到西翁村莊

每到君家卽故園又從今夜宿深村疎燈隔樹山舂
響小艇依沙野渡昏客裏歲時搔短髮天涯懷抱對
孤樽我今欲作龐公隱妻子相携入鹿門

夜與西翁別用陳子昂韻

倦客何曾息浮雲每獨征樽前別親友雪裏發孤城
天地歲方晏關山路不平離歌三兩曲班馬亦悲鳴

拙修齋挽

庚午

學博真儒者才高近古人平生坐一病不見澤斯良
大志身終翳遺文道與新千秋照下土有氣化星辰
其二

宇宙一逆旅浮雲橫古今先生還此路後死獨何心
人去空紗帳春歸自竹林向來山水曲誰爲更操琴

江行

極目郊原盡長江橫馬前漁村背麻浦官樹出陽川
水國清明節春陰穀雨天風帆連上瀨一一賣魚船
送洪君則之驪江

廣陵春水引孤舟三月烟花滿上頭峽坼岸回爲斗
尾江清野濶是驪州東臺白塔遙知寺北渚青山盡
向樓君去風光正如許當時我亦此中遊

田家夜詠

田家近秋候夜臥草虫鳴月細村墟靜山深野水明
歸心下峽急旅食寄人輕百慮茅簷底東方暎已生
牛川

鳴橈上斗尾繫纜宿牛洲
烟火中流絕楓林兩岸幽
川雲暝欲雨水月夜成秋
臥聽棹歌曲悠然生旅愁

夜登清心樓

夜泊扁舟青草灣危樓愁絕獨登攀
烟沉佛塔平林外月出人家古郭間
浩蕩不停鳴峽水蒼茫相接隔雲山
晨帆直下驪江去却是回頭一夢還

宿禮卿草閣

命酒臨池閣移筵復草堂
新歸千里遠故意十年長
北斗垂天直西山得雨涼
秋聲聞已切庭院有叢篁

和叔昌

清夜微雲掩白河月高中語四隣多坐中皆有悲秋
思莫奏臨江節士歌

南澗

偶到會心處徘徊松石間秋花自孤絕生得在深山
奉送慶源洪使君

磨天嶺外卽天涯此路行須一月期地到窮邊方是
郡民從殊俗半爲夷陰山積雪春埋帳青海長風曉
捲旗莫道書生無膽氣看君橫槊賦新詩

浮碧樓

長江流不息萬古意悠悠牧老今安在高樓復此遊

前朝餘短塔落日有虛舟恍惚騎麟事浮雲何處求

永明寺

人言永明寺地卽九梯宮井竭無王澤樓存見佛功
雲生麟窟古木落沮江空唯有居僧在鳴鍾朝暮同

柳下集卷之一

柳下集卷之二

南陽 洪世泰道長 著

詩

西京歌

檀木神歸白馬東八條民俗見遺風山河不廢崇仁
殿花石猶傳長樂宮

其二

麟馬飄然上紫霞東明歸去太清家祇今唯有朝天
石江女時來坐浣紗

其三

平壤城中幾萬家東風門巷柳交花
佳人慣抱朱絃瑟俠客多騎白鼻騮

其四

浪上春風萬柳青行人淚落練光亭
北京送別何時盡南浦悲歌不忍聽

百祥樓

獨上高樓生遠愁清川江水去悠悠
逶迤驛路橫千里重疊雲山出數州
羌笛月明還入夜塞鴻風急不禁秋
興來且就壚頭飲誰識臨邛有倦遊

百祥樓晚眺

一片孤城掛夕陽客心愁絕正西望歌成出塞偏悲
壯賦就登樓更杳茫落木無邊江水急浮雲不斷鳥
飛長乙支破敵名猶在滿目山河古戰場

安陵旅舍示繼叔

我裘蒙戎君馬黃安陵館裏足風霜悲歌彈鋏且歸
去今日主人非孟嘗

鹽州郡齋同崔進士賦

海國鹽州大山河控地形名區開沃壤良牧出明廷
失路官仍佐持身道必經郎君真玉雪父子各精靈
桃李爲潘縣詩書在鯉庭一寒憐布褐其臭接蘭馨

化蜀聞嘉頌遊梁感暮齡平生雙古劍浪跡一浮萍
漢月離家見胡笳出塞聽經過初下榻披拂再登亭
吏牒拋朱印賓筵設玉瓶已知紆禮數俄見定飄零
習坎行方達因山止則寧人應瞻紫氣天欲聚文星
鳳岫雲皆翠龍池雨晦冥帆檣通郡郭鼓角捲滄溟
潮落沙平白霜橫島聳青放歌凌浩渺高視據崑崙
俎豆宗儒祀琳琅大將銘至今聞戰伐回首想儀刑
古蹟心多感新篇眼却醒江關動蕭瑟楚調激清泠
不用煩彈鋏深知許掣鈴興存千里駕愁入九秋螢
樂土終難忘征車且復停南湖采菱曲與子重揚舲

登塩州北城

城上棲鴉定黃昏擊柝聞高樓俯遠海老樹入寒雲
萬里山河勢當時戰伐勲悲歌動歲暮雨雪日紛紛

登北樓懷月川君

月川君即李廷諫壬辰倭亂
守城却賊邑人立碑頌之

此地曾殲賊今來壯所聞戰場多暴骨兵氣尚屯雲
邑有遺民祀功歸太史文時危望西北重憶李將軍

北城晚望

落日垂空濶青天散赤霞潮聲入郡郭海色照人家
客路西江阻歸心北斗賒寒城臨欲閉風急響悲笳

其二

歲暮天涯傷客心
郡樓蕭瑟且登臨
池邊鴈鴛聲相應
海上魚龍氣自陰
落日故懸西望眼
涼風不斷北開襟
故園三月無消息
腸斷秋山何處砧

龍鳳寺

夙抱霞外契
茲遊展清眺
捨馬陟危陁
停策臨海嶠
岌嶢青蓮界
佛殿倚雲峭
金繩引覺路
寶塔流神曜
胡僧炯碧眼
顧我發微笑
問法見真如
翻經入精要
方悲有涯促
益悟無生妙
諸天夜有月
萬象歸一照
水定湛圓鏡
風息虛衆竅
此際何所言
寂寞發孤嘯

鹽城郡齋聯句

明谷昆侖各用手筆
淨寫與之今見在

浩蕩乾坤內浮生各有爲道長駢蛩非一性蘭菊亦

殊時汝和末路牙琴在交情古劍知昌大百年真莫

逆千里得相隨道長官舍携明燭賓筵對玉卮汝和

登樓謝公勝賦雪馬卿奇昌大鸚立當朝正鸞棲下

邑卑道長名慚峴首石興在習家池汝和健筆山河

得清遊觀沼宜昌大綠陂通海滿紅藕度秋衰道長

領略環滁記追騰泛穎詩汝和浦帆寒雨落城角曉

霜吹昌大野入窻中盡天從樹外垂道長重修梧相

閣一讀李侯碑汝和舊蹟丹青改遺祠父老悲昌大

古今殊有感文酒若相期道長壁月三更轉朱欄百

尺危

汝和

綺羅爭夜醉歌曲使人遲

昌大

鳬舄追仙

宰龍宮訪遠師

道長

楓松森寂歷臺殿爵參差

汝和

佛日懸金塔天花隱寶帷

昌大

洞回巖徑約峰拆海

波馳

道長

應接知無暇攀登却忘疲

汝和

奇觀不盡

意浮世故多歧

昌大

惻惻捐親友悠悠告別離

道長

北風征馬動南浦客舟移

汝和

絕藝無知者悲歌欲

向誰

昌大

賴公賢父子憐我拙男兒

道長

卽事成三

影傍人揔九疑

汝和

殷勤白駒詠遲暮重來思

昌大

歲庚午余在鹽城滄浪洪道長從留數月作

文酒之會臨別賦此存窩書

滄浪晚號柳下

郡齋卽鹽州東閣也汝和府使崔公

錫鼎

之

字也昌大乃其胤進士公也臨別酒中相與
聯句余先唱一句公曰書字書公又繼之自
書其字進士公又繼之書名不以字者嫌於
尊也今皆從本書之貴實跡也洪世泰謹識

聽松堂別李秀才

辛未

落日溪頭別君歸水亦流空留春草色寂寞使人愁

清心樓

驪州郭外是長洲落日餘輝半水樓望眼極天孤鳥
去歸心決峽大江流居僧磬出東林塔賈客燈依北

柳下集
岸舟牧老死來空勝地龍門山色使人愁

花石亭

花石亭猶在先生去不歸江春空草長野日自鷺飛
每挹高風遠深嗟俗學非當時有龜老道義竟無違

太古庵贈密上人

絕頂茅庵小雲霞生坐床禪心持半偈慧眼鑑他方
古栢庭前立寒花塔底香真如卽此是不必問空王

別後

昨日樓東別今朝獨上樓青山猶在眼征馬到何州

旅思

旅食仍遷次居然病在身
牛衣雪裏客鶴髮夢中親
城角頻催曉江梅欲報春
歸心與漢水日夜向西津
晚望

暝色將愁至孤城騁目餘
徒勞入關夢不見渡江書
鳥雀山門靜龍蛇水國虛
飄蓬各千里二弟近何如
登南漢山城西將臺有感

南漢城頭落日時黃雲盡
角不勝悲峰高尚憶青駝
馬臺迥空瞻白鵲旗戰地
風烟餘慘淡霜天河岳靜
逶迤明朝又欲扁舟去忍
讀三田渡上碑

曉起送公遠弟

夜語明星爛行人稍下樓依依霧裏別日出馬蹄留

西翁席上次禮卿韻

析析風枝勁沉沉雪夜嚴疎星還暝地微月不盈簾
老興歌初放情談酒屢添愛君流俗內通介自能兼
獨夜

冬至初過臘不逢窮陰冰雪塞寒霄山河獨夜方迢
遞鍾鼓嚴城正寂寥京洛歲時淹伏枕天涯消息阻
回橈幽居更覺傷遲暮白首詩書送聖朝

臘日

今歲嘉平去歲同季冬寒日更多風授時已接三正

統息物還收八蜡功春逼樓臺殘雪白夜喧兒女小
燈紅良辰燕飲堪隨俗却愧朱顏並老翁

山齋

山齋夜雪有誰知山鵲朝鳴山木枝老子擁衾猶不
起梅花開後又新詩

放吟

壬申

天下事不如意世間誰是知音浮雲流水朝暮明月
清風古今

春日

學道方知有此身半生端悔作詩人高齋永日垂簾

坐一樹花開四海春

述哀

自我罹窮阨生趣若枯木賴爾得開口聊以慰心曲
嗟汝今已矣令我日幽獨入室如有聞出門如有矚
觸物每抽思如繭絲在腹哀彼一杯土魂骨寄山足
平生不我遠今夜與誰宿空留絕筆書婉變當面目
開箱不忍視但有淚相續冥漠九原下爾豈聞我哭

其二

銜哀痛入骨百感嬰寢食恍惚音與形昨日猶我側
沉沉淵中珠一墜不可得經時冀或忘逾久思彌劇

悲來隱五內中夜起太息家人知我戚將喻語先塞
相顧但掩袂此心轉愴惻春風動萬物草木回生色
鹿鳴求其子翔鳥奮羽翼人生有不如羨爾反無識
有感

昔與隣兒戲隣兒今獨來東風芳草色忽復滿池臺
風雨

風雨曉淒然已知寒食天傷春又傷別淚落杏花前
出門

一春閉戶愁兼病寒食清明空物華今日偶追少年
子出門始見辛夷花鳴鳩隔樹在何處飛燕入簾知

故家欲使風光不笑我應從醉裏作生涯

寒食行

仲春寒食多風雨城裏人家盡上墓北邙山下無數
冢蔓草荒烟古今路紛紛士女遍中野酒食雞豚兼
賽社馬醫夏畦皆有鬼哭聲應徹重泉下原頭祭罷
委蕩狗躑躅樵歌齊拍手千秋長憶孟嘗君意氣豪
華竟何有是知富貴熏天勢不及春風一杯酒人生
行樂須恣意何用憂愁苦憔悴東隣老翁昔少年昨
日開花今在地君不見北邙山寒食年年人往還

聞鴈

春日江南鴈連行復北飛來時見吾弟何事不同歸

武溪

憶昔尋真此地行武溪春日復含情依然對酒青山
在忽已看花白髮生天濶歸雲多倦態洞虛流水不
停聲移居正喜仙區近每到林泉意自清

洪君則與崔李兩斯文遊閔漬巖歸示我以詩
和之

閔漬巖前三子遊攀援桂樹此山幽穿來一路通雲
際看盡千峰到水頭廬岳猿啼誰逸客桃源花發已
回舟新詩起我登臨興夢落松風山暝樓

聽松堂與君則士彥天資同賦

濯足澗中水登樓山雨來歸雲萬壑暝返照一峰開
勝地人頻改殘樽客未回徘徊撫風珮流悵此池臺
次士彥月溪夜泊韻

上峽多風浪牛川復月洲連山夾兩岸獨夜有孤舟
旅泊同鷗宿歸心競水流津途倦行役浩蕩棹歌愁
聽松堂

萬松環抱一溪回中谷無人寒广開每夜明星西岳
近有時靈雨北壇來山阿寂寂更誰賞風壑泠泠虛
自哀獨見孤雲猶舊態天高不動白崔嵬

西翁與諸子來過

山夜留歸客孤燈耿翠微風泉疑雨至露草見螢飛
嶽近星垂枕亭虛霧入衣君能數來過此地足忘機

伏聞車駕謁聖策士

法駕通宵戒六飛五雲佳氣引龍旂宮中劍珮風聲
遠仗外星河曙色微視學禮爲三代重崇儒道不百
王違更聞親策丹墀下誰把文章補袞衣

夕步溪上贈君範

落木高風生暮愁與君携手到溪頭如今已是悲秋
客別後那堪獨上樓

溪上遣興

落日光猶在秋山夕復清
老楓稀見影寒澗稍聞聲
妙在無言境超然獨徃情
崢嶸千仞壁倚杖看雲生
伏聞車駕幸齊陵路過松都
滿月臺駐輦登覽謹此賦詩以代應制

虎旅遵喬嶽鸞輿駐古臺
千宮捧日月萬騎擁風雷
此地名都會當時霸業開
大功初統合孱裔竟陵頽
宮觀南山頂城池北斗隈
春花擲毬去秋草射麋迴
聖暴殊天命興亡閱劫灰
繁華前代盡感慨後王來
故國市朝變荒墟樵牧哀
馬嘶金井樹烏啄玉階苔

睿覽徵文物宸心戒禍胎宜春誰獻賦獨許長卿才
秋興

野人籬落過重陽滿地寒花寂寞香何限秋光渾不
管獨留虫語五更霜

到農巖山居

峽山何疊重荒塗無阡術穹林上刺天鬱鬱虎豹穴
苟非絕世者安得此焉室良由懷苦心得以配前喆
見我一相笑驩然共蔬糲玄譚討靈域秘思抽道帙
徘徊明月磯放歌衆山出山高只可仰水流長不絕
造化故多奇歛爲方寸物看君山澤癯髭髮勝曩日

鶴鳴在九臯獨立毛羽潔我欲從君遊偃仰此生畢

白雲寺奉呈農巖

白雲雖不盡終有到頭時寺路深難辨天香近始知
僧棲鳥亦定客至月如期正喜高人語山鍾報曉遲
送聖徵之寧邊

鐵甕孤城月驪駒萬里歌秋來添白髮送別故人多
汝九將發因雨阻留一夜翌日始行臨別愴恨
無以爲懷口占一律

客子將行雨阻留今朝無雨却生愁臨歧不忍輕分
手上馬纔容一轉頭采采薜蘿傷遠道茫茫江漢送

孤舟只應夢裏追君去直到昇平古驛樓

汝九別後夜坐有作

夜色還燈火秋山獨掩扉天長傷遠道霜重念寒衣
行子方懷役居人已望歸君非鷓鴣鳥何事每南飛

東溪

東溪物色使我悲昨日會合今別離從來憂喜本同
域亦知聚散無定時日之夕矣羊牛下行人何處初
息駕松梢明月還復來千里江山共清夜

對月贈公遠

秋空明月懸照此酒樽前別意方寥落江行正杳然

霜飛七浦樹鴈落五原天更憶南征客今宵何處眠
送禮卿之安州

風塵爲吏苦摧顏西出悲歌滿古關駐馬登樓臨薜
水高秋落日見香山身遊絕塞浮雲外名動諸侯上
客間此是繁華行樂處男兒有意視刀環

憶禮卿

塞鴻秋盡少南飛游子天涯尚未歸關月只應懸客
夢邊霜無那透征衣他鄉白酒誰相待故國寒花亦
已稀今夜樽前君不見小樓燈火掩重幃

歲晚憶金兒

去年今日爾在抱今年不見我心搗寒天淚盡南郭
雪長夜魂歸北邙草人生百歲不爲多父子四年曾
莫保悲來欲置難遽忘白屋青燈使人老

池上漫興

葵酉

閑來池上枕肱眠影落澄波水底天日午柳風吹拂
面青山還復在吾前

洪仁甫挽

千古心長壽短四海眼大身微積城無限春草生出
青山死歸

聞西翁與諸人出遊華陽亭賦此寄之

聞君避暑華陽亭小吏還能賦在垆邀入苑中看駿
骨醉臨沙渚斫魚腥人間火宅不勝熱郭外雲山無
數青安得輕衫縱馬去新川烟雨共揚舲

東郊

野田禾黍鬱芄芄野老茅茨在樹中雙鷺閑眠稻花
雨亂蟬爭噪栗林風卜居有約年年誤出郭看山處
處同今夜還投上方宿欲將心法問支公

花潭有懷徐先生

不見先生面猶識先生心潭上有明月長川流古今
將向朴淵少憇天磨山城南門

山高不可上歇馬坐城頭突兀憑孤劍蒼茫見數州
鍾鳴蕭寺夕木落故都秋萬古一長嘯英雄幾此遊

大興寺

盤回磴道歷千重古寺登樓已暮鍾衆水合來爲大
壑片雲生處是何峰殘碑尚記前朝事落葉渾埋過
客蹤明日行臨朴淵上欲將興廢問神龍

黃州

三爲西塞客匹馬過黃州寒日長川水蒼山古郡樓
他鄉少相識此去復誰留關路橫千里風烟似昔遊
練光亭

長江如練抱城流
光動城頭百尺樓
箕子故都餘落日
檀君陳跡杳高秋
鳥歸白塔烟中寺
人語青楓浦裏舟
誰道西京佳麗地
山川滿目自生愁

龍岡道中

鴈急西風霜滿天
窮秋關塞氣蒼然
蕭條草木孤城外
迢遞山河倦馬前
落日孤雲隨遠客
黃花白髮感衰年
故鄉縱欲登高望
路盡龍岡地一偏

吉浦秋懷

有弟西南客
吾今亦未回
身留臨海郡
淚落望鄉臺
社燕昨已去
秋花他自開
人生重家室
歲晏可歸來

其二

山月初生夕虫鳴復掩扉客心愁獨臥燈火耿餘輝
林黑鳥棲定江寒人語稀也知鄉路遠猶得夢中歸
其三

客與南飛鴈相逢江浦間
裴回不能去幾日度關山
流水皆東走浮雲亦北還
野人來問我應恠損朱顏
旅懷

歲暮窮鄉滯病居一燈相伴夜窗虛
愁來懷抱欲誰語漫檢家人前月書

還到金川與舍弟別處

柳下集

聞汝先歸上北堂獨憐吾病滯殊鄉今朝却到分彊
處野水寒鴉又夕陽

寄春谷

甲戌

墻西高臥憶墻東老子幽居此意同佳節忽來憐鬢
白濁醪初熟喜花紅閑門草色斜陽裏高柳鶯啼細
雨中千載神交唯點也浴沂春服舞雩風

春興

自知白髮不宜花猶向花前弄物華却恐春心逐柳
絮東風吹去落誰家

客去

乙亥

客去門還掩幽齋臥悄然三春餘短髮萬事入孤眠
乳雀青林杪閑花白日邊從今謝來往且可學逃禪

獨夜

獨夜懸明月天涯共此輝山川一何遠客子幾時歸
草露霑仍重星河望漸微孤懷繞庭樹烏鵲莫驚飛
送劉德而之龍濟

京洛相逢止半年今朝悵別市橋前愁來立馬臨秋
水醉後聽蟬向暮天出塞欲尋濟館路還家先上涓
江船離心獨有涼州曲寄入胡姬錦瑟絃

寄劉德而

淚江歸客意如何萬里還悲出塞歌昨日與君爲別處獨留衰柳暮蟬多

書懷

每欲移家住近山此身於世不相關須管草閣無墻壁盡取千峰入臥間

寓居

草屋簷何短褰帷臥見天秋深露始結夜久月孤懸奉老憂多病移居苦少錢不眠聞落木兼此感流年有感

處世何人百歲能一生歌哭苦相仍今朝又報阿兒

死却憶頭陀峰上僧

余十年前嘗遊關東頭陀山山窮路盡緣峭
壁而上絕頂平處有小庵二僧居焉年皆七
十餘厖眉雪衲不下山三十餘年矣是時春
暮山極深峻不見花亦無鳥雀聲有蝴蝶一
雙栩栩然飛繞於庭前細菜之上剝竹引泉
自遠而至從屋上墜于槽淙淙有聲余問僧
曰老和尚亦有思慮乎曰居此久不與人接
身既無累安有思慮余聞此言不覺爽然自
失四十年人世汨沒苦海之中欲出不得雖

欲爲此僧其可得乎每當悲惱死生之際輒
復思憶今年哭一子又哭兩侄兒哀痛慘絕
口占一絕仍并記其事云

爲李處士詠盆梅

窗外千峰積雪床頭一樹寒葩看君道骨清甚莫是
身學梅花

其二

眼明忽驚新藥坐久渾忘暗香夜來抱琴花底恰有
孤月流光

其三

縱在人間非俗却從林下爲生不恨終身寒苦自知稟性孤清

其四

花中亦有高士天下豈無真仙流水青山境界小窻烏几因緣

其五

窮陰剥處生意明月圓時返魂雪埋山下幽逕春動水邊孤村

過北隣

丙子

幽居伏枕動經旬今日開門始見春溪水忽生知得

雨柳風雖惡不妨人每探花事來東崦却逐鶯聲到
北隣欲識老夫疎懶態白雲惟爾似吾身

遣興

輕陰弄日暖春空小閣餘寒物老翁隔屋鳴鳩如卜
雨傍溪垂柳不禁風幽居伏枕何人問節物關心去
歲同笑喚山妻催釀酒清明欲近杏花紅

題洪君則葬兒詩後

覽君瘞天作一讀有餘悲尚憶初生日終非暮出兒
青山怨杜宇春雨暗棠梨此痛吾偏甚猶看子未衰

憶龜兒

草宿新墳歲已回一嗥猶阻寫深哀依然昨夢聞兒
語想有孤魂待父來山店紙錢寒食過野田樵火白
楊摧獨憐先壠長隣近多少諸孫膝下陪

和常卿絕句

莫上白蓮去留爲明日遊恐教佳處盡無復入山求

寄西翁兼簡春谷

西園詞客好風流何事逢春不肯遊燕子歸來開社
酒杏花零落掩山樓詩將勝地公然廢病對韶華半
是愁更報城南居士道可能連騎到林丘

山行

山路將窮轉水涯忽看林際是誰家
閑猿不解迎人吠老樹當蹊臥發花

述志

十年窮厄坐虛名慙恨迷途枉此生
近向道中知有味漸於身外欲忘情
洗來急雨山還靜過盡浮雲水始清
今日聖賢書滿眼試從何處着吾誠

次李大來箭郊韻

箭郊春草接江關牧馬千羣散此間
可惜龍媒空老死無人騎去到天山

雨過

急雨捎山過溪樓水半扉薄雲猶帶濕纖月稍生輝
鳥宿知行止蛙鳴競是非悠然觀物意一笑付天機
送宏弟往問水村主人

當時漂母飯王孫尚愧千金未報恩送爾此行生舊
感豆花秋雨臥孤村

李萬戶挽

長白山頭秋月輝磨天嶺上鴈南飛去時妻子今迎
哭萬里牛車不是歸

西翁與諸子携酒來宿溪堂爲別

欲別皆親友孤燈語更長清樽一夜盡白髮兩心傷

薊樹秋蕭瑟遼河路杳茫却憐簾外月隨我向他鄉

蕭寧途中

驛騎衝星過泃關西征幾日到龍灣地遙屢失還家
夢霜重先摧出塞顏朔氣漫空薩州戍秋陰欲雨蕭
川山邈來詩律多悲壯宛在荆高擊筑間

安州

安州控扼壯關防西去龍灣接瀋陽地出勁兵同趙
代城摧強敵閱隋唐徘徊落日江流急慘淡凶年野
色荒此是行人斷腸處更看前路極天長

百祥樓

薩水滔滔日夜流西風吹動百祥樓迎霜鼓角音何
厲近塞山川氣不柔節度有魂餘古廟乙支無跡但
虛舟登臨物色傷心地未到龍灣已白頭

晚望

萬里登樓目蒼然見古今山河皆朔氣城郭更秋陰
旗動臨江色笳橫出塞音將軍破敵處俯仰一霑襟

曉起

客子起中夜高樓霜霰微繁星寒更動宿鳥暗相依
夢恠或書壁愁多頻攬衣前途不敢問况復說東歸
登宣川倚劍亭憶金將軍

當日宣川守深河戰不歸大東臣獨有中國事全非
尺劍餘秋色孤城半落暉悲歌塞天濶倚馬看雲飛

夕抵龍川

隴月昏猶照微光在馬頭行人暗相語共是出關愁
登義州統軍亭

龍濟地卽玉門關萬里西征尚未還獨上危樓蕭瑟
後平臨大漠杳茫間秋風葉下鴨江水朔氣雲屯松
鶻山愁殺胡笳出塞曲行人有淚落刀環

龍濟歌

龍濟地接古遼東塞俗相傳有俠風妓女皆能騎駿

馬小兒生卽引琯弓

其二

生長邊陲意氣多身披胡服脚尖靴逢人半作中華
語上馬先爲出塞歌

其三

鴨江西望白雲間漢使乘槎昔往還欲向傍人問前
路鳳凰城外是何山

其四

勸君今夜盡餘杯一渡龍灣幾月迴燕塞秋風吹馬
去漢陽春草待人來

其五

淚落哀笳不忍聽
行人莫上統軍亭
秋深塞草蕭條白
日暮胡山歷亂青

統軍亭

萬古傷心百尺樓
蕭條沙塞眺高秋
山河氣鬱常如怒
堞壘形危盡欲愁
旗捲朔風來大漠
角吹孤月下涼州
明朝更有分離恨
直到中江始放舟

重陽與劉德而登統軍亭

城上高樓天四開
浮雲落日共徘徊
參差衆岳遼東出
斷續孤鴻漠北來
白髮不堪吹帽節
黃花無數望

鄉臺故人置酒能千斛羌笛琵琶莫謾哀

灣上

鼓角悲秋聽胡天夕復空宿雲低薊北孤月出遼東
鞍馬他鄉遠關山此路窮客愁歸未得先我有南鴻

灣上秋興

九月風沙振大荒邊城秋日淡無光磧中草帶西霜
白關上雲連北氣黃牧馬每窺當路塞請纓誰繫左
賢王傷心萬古華戎界剩水殘山是戰場

其二

夜醉華筵倚劍眠夢回方覺是窮邊城寒戍客笳中

月野靜單于獵後烟榆落只應先北地鴈飛何處盡
南天故園物色重陽過叢菊花開也可憐

尚憶

尚憶單車入瀋陽思歸一曲淚千行傷心忍說當時
事老眼難看此虜亡縱有東臣非范蠡自爲南帝豈
懷王西方欲問知何處馬耳山高鴨水長

第六指吳
三桂事

留別任行臺

絕域無端久滯留征車將發更回頭猶能出塞攀驄
馬獨未臨江上桂舟酒後黃花虛滿地夢中寒雨故
侵樓平生不解傷離別今日辭君始欲愁

馬上作

關路秋風杖劍歸馬頭黃葉亂投衣人穿曠野微茫
去鴈帖孤雲隱約飛左海此生行欲老中原回首意
多違從今只合收蹤跡永保幽居杜德機

咏畫二首

草澤潛光世莫猜釣臺曾不換雲臺平生悔識劉文
叔多事羊裘物色來

右嚴光

羊裘釣澤中

梁甫吟成抱膝時渭川莘野遠相期使君不學湯三
聘那得祁山六出師

右諸葛亮

抱膝吟梁甫

寄西翁白川庄

凶歲歸田也自閑洛中多事不須還霜前獲稻秋行
野雪裏尋僧夜到山生世食衣裁取足暮年兒女亦
怡顏獨憐天地無家者白首湛浮市巷間

澄懷閣對雪和主人用龜谷韻

暮天初雪落風力入山扉返照明邊見橫雲斷處飛
到門深沒馬留客細霑衣酒盡吾當去棲鴉亦早歸

雪中訪李處士華國

獨徃西林日已昏暗隨樵子到柴門深深雪沒溪中
釣漠漠烟和樹裏村正好擁爐開小酌忽思觀獵出
平原憐君苦作衰安臥死不從人肯乞恩

晚過北村

草屨衝山雪行行踏澗沙千峰唯一路獨樹是誰家
客至聞寒犬樵歸伴夕鴉溪風吹小立渡水幅巾斜
苦寒行

長安雪後多北風大寒應知天下同五城宮闕無暖
氣何況牛衣白屋中比歲不登民半死嗚呼栗烈復
此冬山欲樵兮雪崢嶸水欲漁兮層冰橫我願司寒
莫傷人殺彼虎豹無得行

其二

今年苦寒無古昔臘月雪下平地尺城中束薪貴於

桂北岳南山一色白八蜡不廢索萬物赭鞭鞭草何
所益跋鳥側翅不敢飛密雲蔽日難爲暉可笑野人
思獻曝不識君王狐貉衣

其三

東隣布衣空白首閉戶讀書甘自守心中鬱鬱萬古
事夜起彷徨看北斗歲暮天寒地凍裂嚴風烈烈吹
飛雪朱門酒肉爛如土貂裘豹炭坐生熱焉知路傍
有餓莩惜我無力能汝活

送亨甫之平壤

丁丑

憐君不得意匹馬欲何之壯士多貧賤衰年有別離

春城柳色動荒澤鴈鳴悲淚上看芳草相思知爲誰
送汝九

家貧每爲別世難多所慮人生百歲間能得幾悅豫
如何春鴻歸送爾復南去久知此當有摻袂何太遽
依依兄弟情惻惻老親語東風吹游子立馬山欲曙
出門一以遠行矣逐徒御迢迢大江南路盡飛鳥處
羈旅易爲感異鄉難久據毋使我門柳相思盡飛絮

昨日

昨日別離處今朝見行跡馬嘶如可聞千里起咫尺
江南有春草嗟爾遠遊客

病起

病起猶能步孤遊入洞門心知雲際路坐愛水邊村
雪壑流初響春山氣自昏相逢有樵者意足各無言

簡蕉窗

南殿直廬

南宮春日柳初黃齋沐連旬學太常星象夜瞻天北
極御容朝拜殿中央庭陰自接樓臺肅獄氣常和
草木香料得此間無一事應將歌頌續芝房

贈西翁

海曲三冬滯雪霜江西寺裏宿僧房還同客鴈懷前
侶更逐春風入故鄉書閣掃來山色滿酒壚開後柳

條長只憐抵老無多興浮世交遊半在亡

街上口占

雪盡橋頭萬柳新御溝流水綠粼粼
暉暉日轉青臺午漠漠雲開紫閣春
聽得歌鍾皆甲第閱來車馬少閑人
君看漢代長安市季主當時亦隱淪

西翁與禮卿夜過留宿用唐人韻

故人一斗酒尋我杏花林暗露沾衣重
春星映戶深飛騰少日事寂寞暮年心
臥聽松風起泠然空外音

簡大材

老子墻頭花正開繁枝數日卽莓苔
春風黃鳥一斗

酒借問故人來不來

待大材用前韻

昨未開花今又開
思君不見步庭苔
應知西巷春醪熟
待與東林好月來

汝九家花下詠

獨行庭樹下遙憶海雲邊
萬里同春色看花各悵然

獨往

獨往猶知路披雲坐復行
洞天如欲雨山木忽聞鶯
水足流常緩花高色最明
更須前一步深入境彌清

奉次農巖觀魚韻

春風高倚玩漪臺俯視羣魚出曝鰓爲是餌香忘不
得避人纔去却還來

題幸湖歸來亭

栗里田園好歸來五柳存無人爭一壑盡室住孤村
山雨花垂逕江春水到門醉鄉天地大高枕老樗根

其二

百戰孤城在江山古幸州世傳三畝宅新買一漁舟
夢不騎天馬身唯狎海鷗將心寄雲去終日繞滄洲

新主人公解太僕故第五及之

其三

萬里西江水爲君樓下池鶴飛迎客慣魚出鼓琴遲
怒浪吹還息虛舟靜不移從來二千石那換一竿絲

其四

種樹千章大開田百頃寬封侯此爲等生世不須宮
牛懶眠豐草鷗輕避急湍暮山多變態樓上臥平看

其五

莫謂蘭舟小猶能載翠娥暮年閒日月安處少風波
野抱孤村迥山連數郡多持觴勸漁父和我醉時歌
與洪君則洪道陳李君美登三清池閣

竹淨荷香池閣幽葛巾終日坐欄頭峰陰寂歷常垂

地雨氣空濛忽滿樓纔出洞門皆火宅却來林下是
丹丘携君更欲窮源去山路雲深不可求

哭西翁

天地亦已久淳風散其真玄理何茫茫恒喜極善人
斯世之所無何得永子身平生孝友心零落委丘榛
體魄淪厚壤精爽返穹旻藥雲御赤螭焱舉登北辰
生能急人困死豈無其神願子爲雨師甘澍澤枯民
葬西翁夕歸

朝往哭我友零雨自西來夕歸山齋臥滴瀝簷溜哀
餘悲旣難忘往念復徘徊昔子與我好高義實愛才

形忘折輩行意得輕貨財風流命翰墨萬物聽其裁
今春杏花盛邀子以金罍酒酣撫繁枝起視西日頽
花飛結其子人去不復迴沄沄東逝水鬱鬱長夜臺
我今終已矣情至孰爲開

雨中遣悶

久雨添幽趣燒香好讀書猶看階闕蟻不覺釜生魚
白水閑門入青山午睡餘四隣多絕火吾敢恨貧居
與李處士劇談古今事冒雨晚歸

君何多病我何窮俯仰乾坤此意同語罷出門山雨
細一川垂柳滿簑風

聞絡緯

清夜山風生桂枝星河垂地白逶迤今年更覺迎秋
早六月西林絡緯悲

獨立

獨立烏紗柳影中長川流月去無窮此心却在孤雲
外天際吹來滿面風

題昆侖子哭柳太常詩後

我讀昆侖哭柳詩筆端鼓舞何其奇爛如游目五都
肆火齊木難光陸離凜如身入武庫中霜鋒雪鏑排
差差縱橫出入三百字氣雄語壯意則悲昔子摘藻

尚高華力追開元數作家乃知才大無不能赤手居
然捕龍蛇吾聞子房貌婦人胸中有膽大於身博浪
一椎天下動英雄萬古嗟其勇邇來文章不滿眼相
門父子清論重欲將風雅洗陋俗徃徃青雲見推轂
惜哉柳子何命薄不及身作籠中藥作詩哀之亦何
益今日高才已冥漠人生自古貴知己孔圍豈不稱
文子嗚呼世間難遇九方臯何限驊騮伏櫪死

三清洞歌

白蓮峰作龍虎盤中有三清古玉壇壇前鬱鬱松樹
林洞陰六月靈風寒少年携酒此來徃與遊者誰皆

吾黨蕉翁落筆雲烟動林老放歌巖谷響數十年來
非舊觀萬松濯濯偷斫殘坐令神嶽日憔悴骨立雲
根剥蒼翠小民干法不容誅直恐元氣終凋枯哀壑
無光水流急山鬼谷深風號呼同遊故人復誰在獨
見青山今不改人間俯仰已如許滄海桑田豈虛語
欲飛不飛松上雲知我此懷惟有汝

書懷

富貴本非吾願溪山那是世情千古心中至樂一生
身外浮名王

王昭君

遠嫁無金莫謾悲世間終古妬娥眉當時只在深宮裏老死君王也不知

鐵車牛行

大車彭彭服兩牛前牛後牛皆垂頭牛罷車重行不得十步之內五步休借問車中載何物官家鑄錢須銅鐵此鐵由來出南蠻萊州大商緣其間滄溟萬舸簇蝟毛釜山掛帆來龍山長安六月烘如火鐵車相連北山下將軍幕府壓山谷萬夫橐籥張爐冶爐中一日得千萬鐵貨更與萊商販萊商日富錢日賤九府何曾救人困還聞細民竊爲幣徃徃私鑄干邦憲

官家養牛亦有食車丁歲饑分牛飯我謂車丁鞭莫
疾牛蹄蹶今車軸折車軸折尚可牛斃不可說弓牛
之角甲牛皮官家鑄錢何時畢

春翁挽

有才不必用夫子信英奇天生絕代手神解得於棋
達觀齊得喪萬古一戲爲胸襟故礮壘洗之以酒詩
功名豈吾輩不朽其在茲嗚呼凌雲氣歛彼荒山陲
人生有一死終亦不足悲君看守錢虜身沒復誰知

其二

西翁昨已化親朋痛一哭如何君又逝使我涕淚續

臨川撫頽運益覺浮世促嗟爾征途上冉冉行相逐
真觀是何地兩翁同一麓默念精爽合不異西樓宿
平生短歌行蕭瑟動山木徒令生者悲嗷嗷向斧屋

晚步

今年節物故相催八月黃花已半開病體常從林下
臥詩情獨繞水邊來寒蛩伏草時時語老鴈隨陽一
一迴倚杖秋天晚空濶片雲何意亦徘徊

散步

散步涼天夕西風吹鬢斜暮年依老圃幽意共寒花
入穴看封蟻爭枝有墜鴉秋山日在眼曾不離吾家

早興

風露高齋曉離離見菊花早興先宿鳥清坐向朝霞
得意溪山近忘機市井除嶺頭黃葉樹半落是誰家
礪峙途中

野水寒初落平蕪淡已黃風高鷹隼健露下菊楓香
傍馬千峰競迎人五堠長悠悠行路者誰了一生忙
嫩竹

嫩竹纔數尺已含凌雲意騰身欲化龍不肯臥平地
題胡僧圖

千峰行欲盡獨立倚長松不覺山深淺微聞何處鍾

其二

舉手指白雲山童前自跏不知何所言只是山中事

此歲

戊寅

此歲又三日流年那得遲迎新終是老撫往昔爲兒
地氣泉初躍春心柳欲垂簾間聊隱几聽鳥獨移時

楊根道中

楊根古峽內十里半空村野火無人滅春山欲雨昏
客行防虎跡農事聽禽言恨落東風後先吾入故園

奉送杏翁歸西湖別業

江湖城郭兩悠然今日東風似去年暫向竹林招飲

客却乘春水買歸船孤琴在膝先迎月雙鶴隨身並
化仙從古男兒饒富貴只應難臥好山川

奉送豐德金使君

纔看初服返莧裘却有雙鳬別杏洲野樹花明寒食
後春江浪足使君舟連年積葦悲鴻鴈傍海新耕起
鵝鳩五馬此行留不得聖朝今日急分憂

對杏花悼西翁

去歲墻頭杏今春又欲開可憐花裏鳥猶喚故人來
送金生

柳條不須長曾不繫征人獨有路傍土猶得上車輪

嗟爾遠遊子出門辭老親負米豈不勞傷哉仲由貧
遙遙五馬後跋涉多苦辛所賴神明宰投跡得依仁
峽中郡邑幽雉雠桑麥春盤飧足哺啜慰子蒙袂身
丈夫有志氣寧久涸轍鱗處約須自奮讀書無凡民

感春

每歲逢春擬遊行今日東風坐流轉病中春思太懊
惱咫尺懷人更難見昨臥西樓聽山雨杏花墻頭落
萬片却笑老子似兒女白首猶結花鳥戀明朝出門
獨惆悵綠陰滿地鶯百轉

夜來月色微明落花滿庭獨坐悄然有懷情人

溪上柴門掩白雲杏花風落雪紛紛一年春事今如
許山月孤懸不見君

禮卿見過用杜詩韻

柳下柴門苔逕微門前有客見鶯飛相思昨夜月初
滿卽對故人花已稀此地山深同野寺誰家酒熟當
春衣莫嫌藉草移時坐好放囊雲送子歸

送客之江都

憶曾爲客沁州城獨上高樓意不平鐵馬坐看天塹
渡布衣誰遣瀋陽行海門夜雨潮兼至戰地春風草
又生今日朝廷還乞米送君西去大江橫

中興洞

一入中興洞千峰不可分孤庵問樵子敗堞弔將軍
古壁花垂雨春潭氣吐雲漫山肥膩草步步佛香聞
其二

突兀雲臺峻齊標露積雄根蟠千地裂勢與九天通
積氣生青靄飛流掛白虹山僧或能上只是借冷風
其三

昔別名山去人間二十年再來猶一路此地卽諸天
日暮雲中磬春深樹下禪潺湲西澗水昨夜夢依然
其四

舊識三峰是茲遊四子同採芝深谷裏吹笛白雲中
石坐危相向溪行折復通長松一百尺鶴羽墮天風
其五

窈窕春山裏唯聞黃鳥鳴遊人臨水飯樵客踏花行
雨氣孤峰濕泉流萬壑平窮源不可得前去只崢嶸

閔漬巖

閔漬巖頭花正紅倚花吹笛向春空不愁前路穿雲
遠且坐松風澗水中

看山

看山宜緩不宜忙意與清溪繚繞長溪水欲窮山亦

盡一身穿過百花香

文殊寺

蕭寺昏鍾度上方
俯看千界一微茫
星搖絕頂樓臺影
風散諸天草木香
行處嶽雲生蠟屐
坐來江色到禪床
當時老宿今無在
不恠滄翁白髮長

下山

山花欲落始登山
看盡千峰一宿還
雲與老僧留絕壁
水流隨我下人間

初夏溪上漫興

燕語鶯啼山寂然
客來相對午窗眠
不知庭草欺人

甚一雨青青到臥邊

晉卿禮卿過宿柳下亭同賦

昔與林翁宿君時亦在傍依然此賓主不謂有存亡
月落泉聲小蛙鳴雨意涼樽前非歎所白首易悲傷
和禮卿西翁墓下作

荒原草已宿是謂子昭墳駐馬誰迎客持杯獨勸君
平生餘短碣萬事一浮雲杜宇啼山木傷心不忍聞
又和春翁墓下作

縱有盈尊酒君能更飲之此生無復見未死卽相思
日暮野花落山空流水悲西翁幸隣近泉下亦論詩

晚晴

西岑雨初歇落日澹餘暉
樵牧時相問牛羊各自歸
野橋橫水斷村路入烟微
倚杖一舒嘯長天唯鳥飛

鵠巖

金施普清涼
別業雜詠

層巖宜四望獨上意如何
落日滿原野青山天際多

沙川

西川昨夜雨水深不可渡
隔岸見漁樵數家臨水住

栗園

野人似麋鹿偃息長林間
入林聽黃鳥出林見青山

桑林

鳩鳴桑葉綠蠶女各提筐待到蠶成日繰絲誰短長

稻田

新移水田秧討草鋤莫緩耨一何繁稻苗一何短

菊塢

種菊須滿地散之山澗阿真同隱君子林下不嫌多

蒙泉

幽泉出山根泱泱鳴玉珮誰言此細流下及千畝大

石池

山池夕流滿孤月正徘徊遙夜林中意幽人每獨來

西村

孤村隱西崦日夕見炊烟籬落遙相向分明隔一川
花巷

花開村巷靜日永野人稀寂寞世高枕林風時動扉
西山

田翁占雨候朝起啓柴關荷鋤出林去雲生三角山
樵蹊

東峰多雲木一逕入林色樵歌隱深處隔水不相識
牧坪

大牛臥長坂小牛猶食草朝去暮還來自識林中道
聽雨

聽雨西林下蕭然一炷香三人同夜坐六月已秋涼
遠水山根響微螢草際光清虛日滿腹丘壑意何長

東澗

清晨入東谷盥濯山澗中朝光隱翠壁雨氣方冥濛
賤濺石上溜蕭蕭松下風形神一蕭散萬慮遂爲空
却顧綠野澗何去騎牛翁

田家詞

田家老翁年七十頭戴青青大翁笠朝出前溪風滿
蓑山雨來時荷鋤立荷鋤立心自閑野田中徃復還
人言田家苦我道田家樂五月桑麻繞茆屋麥熟滿

籌蠶上箔人生衣食裁取足身爲老農吾不惡君看
賣珠長安市赤日當天汗雨落

池上對月吟示施普

月出東山外迎吾上翠微却來幽澗底相與弄清輝
瀑水多吹面輕雲欲染衣形神覺悄悄愴踏露夜深歸

又對月

東山一壺酒又與月相期半露深松裏孤懸靜夜時
水聲歸遠野人影在清池共此丘中意沉吟青桂枝

牛背吟

手把南華齊物篇坐來牛背杳長天浮雲流水行行

遠直到西峰古寺前

重過金子清涼別業

下馬柴門暝村童慣我迎
投身及鳥宿入室有虫鳴
雨果多先落山尊只半傾
居然感時物暑退卽涼生

秋霖

夏熱固已劇秋霖亦何多
西齋高柳底開戶眺長波
却顧白嶽山天壁青巍
洩雲止其首膠葛象龍蛇
散爲天下雨平陸翻江河
旣慮羽垣屋復思傷豆禾
禾傷萬民饑屋塌一家瘡
吾意正如此彼蒼其謂何



朝起

朝起清盥櫛四體任閑適
碧氣滿虛帷餘雨映山滴
對案披古書前脩祝可覲
年代邈也緬神期猶未隔
叢叢庭下菊綠葉抱幽石
綠非薺陽姿秋色自清歷
草虫亦何意孤吟以終夕

題野人屋壁

野老籬低見遠山
江天落日鳥雙還
耕雲釣月誰非事
縱道身忙也是閑

柳下集卷之二





木

一

卯

一